

武英殿聚珍版程式
文房職方圖贊
續文房職方圖贊



武英殿聚珍版程式

金簡撰

中華書局

武英殿聚珍版程式

此據聚珍版叢書
本排印初編各叢
書僅有此本

御製題武英殿聚珍版十韻

有序

校輯永樂大典內之散簡零編。並蒐訪天下遺籍。不下萬餘種。彙爲四庫全書。擇人所罕觀有裨世道人心及足資考鏡者。剞劂流傳。嘉惠來學。第種類多則付雕非易。董武英殿事金簡以活字法爲請。既不濫費梨漿。又不久淹歲月。用力省而程功速。至簡且捷。考昔沈括筆談記宋慶歷中有畢昇爲活版。以膠泥燒成。而陸深金臺紀聞則云。毘陵人初用鉛字。視版印尤巧便。斯皆活版之權輿。顧埏泥體。鑄鉛質。俱不及鋅木之工緻。茲刻單字計二十五萬餘。雖數百十種之書。悉可取給。而校讎之精。今更有勝於古所云者。第活字版之名不雅馴。因以聚珍名之。而系以詩。

稽古搜四庫。於今突五車。開鐫思壽世。積版或充闕。張帖唐院集。周文梁代餘。同爲製活字。用以印全書。精越鵬冠體。昨歲江南所進之書。有鵬冠子。即第字版。第字體不工。且多謬誤耳。富過鄴架儲。機圓省雕氏。功倍謝鈔胥。聯腋事堪例。埏泥法似疎。毀銅昔悔彼。康熙年間。編纂古今圖書集成。刻銅字爲活版。排印藏工貯之。武英殿歷年既久。銅字或損。或耗甚多。已爲非計。且使銅字尙在。則今之印書不更事半功倍乎。深爲惜之。刊木此斬予。旣復羨梨棗。遠教慎魯魚。成編示來學。嘉惠志符初。

乾隆甲午仲夏

武英殿聚珍版程式目錄

奏議

成造木子有圖並木槽

刻字有圖並木床式

字櫃有圖並式

槽版有圖並式

夾條一分通長 一分短長 半分通長 半分短長

頂木與夾條總式

中心木與夾條總式

類盤有圖並式

套格有圖並式

擺書有圖

墊版

校對

武英殿聚珍版程式 目錄

武英殿聚珍版程式 目錄

刷印

歸類

逐日輪轉辦法附輪轉
印課程

武英殿聚珍版程式

奏議

乾隆三十八年十月二十八日。臣金簡謹奏。爲酌辦活字書版。仰祈睿鑒事。竊臣奉命管理四庫全書。一應刊刻刷印裝潢等事。臣惟有敬謹遵循。詳慎辦理。今聞內外彙集遺書。已及萬種。現奉旨擇其應行刊刻者。皆令鑄版通行。此誠皇上格外天恩。加惠藝林之至意也。但將來發刊。不惟所用版片浩繁。且逐部刊刻。亦需時日。臣詳細思維。莫若刻做棗木活字套版一分。刷印各種書籍。比較刊版。工料省簡懸殊。臣謹按御定佩文詩韻詳加選擇。除生僻字不常見于經傳者不收集外。計應刊刻者約六千數百餘字。此內虛字以及常用之熟字。每一字加至十字或百字不等。約共需十萬餘字。又豫備小註應刊之字。亦照大字每一字加至十字或百字不等。約需五萬餘字。大小合計。不過十五萬餘字。遇有發刻一切書籍。只須將槽版照底本一擺。即可刷印成卷。倘其間尙有不敷應用之字。豫備木子二千個。隨時可以刊補。其書頁行款大小式樣。照依常行書籍尺寸刊作木槽版二十塊。臨時按底本將木字檢校明確。擺置木槽版內。先刷印一張。交與校刊翰林處詳校無誤。然後刷印。其聚木子大小共應用十五萬餘個。臣詳加核算。每百字工料需銀八錢。十五萬餘字約需銀一千二百餘兩。此外成做木槽版備添空木子以及盛貯木字箱格等項。再用銀一二百兩。已敷置辦。是此項需銀。通計不過一千四百餘兩。臣因以武英殿現存

書籍核較。卽如史記一部。計版二千六百七十五塊。按梨木小版例。價銀每塊一錢。共該銀二百六十七兩五錢。計寫刻字一百一十八萬九千零。每寫刻百字工價銀一錢。共用銀一千一百八十餘兩。是此書僅一部。已費工料銀一千四百五十餘兩。今刻聚木活字套版一分。通計亦不過用銀一千四百餘兩。而各種書籍。皆可資用。卽或刷印經久。字畫模糊。又須另刻一分。所用工價。亦不過此數。或尙有堪以揀存備用者。于刻工更可稍爲節省。如此則事不繁而工力省。似屬一勞久便。至擺字必須識字之人。但向來從無此項人役。卽一時外僱。恐不得其人。且滋糜費。臣愚見請添設供事六名。分領其事。所有刊刻木字十五萬。按韻分貯木箱內。其木箱用十個。每個用抽屜八層或十層。抽屜中各分小格數十個。盛貯木字。臨用時。以供事二人專管擺版。其餘供事四人。分管平上去入四聲字。擺版供事按書應需某字。向管韻供事。喝取管韻供事辨聲應給。如此檢查便易。安擺迅速。查武英殿現有臣等奏添書吏二名。改爲供事。止須再添供事四名。閒常皆令在檔案房書寫檔案。遇擺字時。卽令應役。如果勤慎。五年之後。歸併武英殿修書處供事一體辦理。如此擺字之人。旣不必外僱。而于辦理活字版更爲有益。臣因刊刻遺書工料浩繁。起見。不揣冒昧。謹照御製命校永樂大典詩刻成聚木活字套版共四塊。並刷印黑紅格子樣式各五十張。恭呈御覽。是否可用。伏候聖訓遵行。謹奏。奉旨甚好。照此辦理。欽此。

乾隆三十九年二月二十三日。臣永瑤等謹奏。臣等辦理四庫全書。所有永樂大典內探出散篇彙輯成部者。頗有堪以刊行之書。應行刊刻。前經臣金簡奏准用活字版擺刷。現在籌商應辦諸事。因此等散篇。

原錄草本。移改增易。行字參差。難以照式排版。而正本又不便令其校對。至有污損。臣等公同酌議。此等應刊書籍。非另辦副本不可。擬于國子監揀派。現食膏火之內。肄業貢生十名。到武英殿照現在行走貢生例。專供校錄刊本之用。並擬派原任翰林院編修祥慶承辦擺版之事。業于本月二十二日。臣于敏中而奏。仰蒙俞允。再檢擺版字。必須供事經手。前經臣金簡奏明。額設供事六名在案。但查字版頭緒紛繁。六人尙不敷用。擬再添供事六名。統照武英殿供事之例一體行走。以資供役。理合據實奏聞。仰祈聖鑒。奉旨知道了。欽此。

乾隆三十九年四月二十六日。臣王際華英廉金簡謹奏。爲請旨事。前經臣金簡奏請將四庫全書內應刊各書改刻大小活字十五萬個。擺版刷印通行。荷蒙允准。嗣又仰遵訓示。添備十萬餘字。二共應刻二十五萬餘字。現已刻得足數。排用仰蒙欽定嘉名爲武英殿聚珍版。實爲藝林盛典。擬于每頁前幅版心下方列此六字。至所有工料。前經臣金簡奏明。領過廣儲司庫銀一千四百兩。茲添刻木字等項。尙屬不敷應用。請仍在廣儲司銀庫內再領銀八百兩。統俟臣金簡另行核實奏銷。現在四庫全書處交到奏准應刻各書。應按次排版刷印。每部擬用連四紙刷印二十部。以備陳設。仍各用竹紙刷印。頒發定價通行。其某種應印若干部之處。臣等謹會同各總裁酌量多少。另繕清單。恭呈御覽。所需刷印紙張工料銀兩。除現在武英殿存貯通行書籍贏餘銀一千七十兩四錢五分八釐。堪以支用外。應請再於廣儲司支領銀二千兩。以備刷印。仍照武英殿通行書籍之例。俟收到價值。陸續歸款。其書內生僻字。必須隨時增添。

及將來刷多模糊。應行換補者。無庸另行支領。應卽于武英殿每年奏請備用銀兩項下核實支銷。至此項書籍。既經頒發。嘉惠藝林。必須排列精審。現在已責成原任翰林祥慶。筆帖式福昌。專司其事。其原書樣本。尤須校對詳慎。應請卽于每頁後幅版心下方印某人校字樣。俾益專其責成。校對自更不敢草率。再查御書處現行之例。凡做墨刻字人等服役之日。俱給與分例飯食。今排印聚珍版處。亦照此辦理。至額設供事十二名。專供擺版。實與匠役無異。與別館僅供登記收發者有間。應請亦照匠役之例。遇有擺版之日。給與分例飯食。庶令常川供役。免致遲誤。其無書可擺之日。仍毋庸濫給。理合奏明請旨遵行。謹奏。奉旨。好。知道了。欽此。

乾隆三十九年五月十二日。臣金簡謹奏。爲奏聞核銷錢糧數目事。前經臣奏請將四庫全書內應刊各書。改爲活版擺刷通行。擬刻大小木字十五萬個。每百個約計工料銀八錢。並成做槽版及盛貯木字箱格等項。約需銀一千四百餘兩。荷蒙允准。嗣又仰遵訓示添備十萬餘字。約需銀八百餘兩。通共請領過銀二千二百兩在案。臣督同原任翰林祥慶。筆帖式福昌敬謹辦理。今已刊刻完竣。細加查核。成做聚木子每百個銀二錢二分。刻工每百個銀四錢五分。寫宋字每百個工銀二分。共合銀六錢九分。計刻得大小木字二十五萬三千五百個。實用銀一千七百四十九兩一錢五分。備用聚木子一萬個。計銀二十二兩。擺字楠木槽版八十塊。各表九寸五分。寬七寸五分。厚一寸五分。每塊各隨長短夾條一分。工料銀一兩二錢。計銀九十六兩。每塊四角包釘銅片。工料銀一錢五分。計銀十二兩。板箱十五個。每個工料銀一

兩二錢。計銀十八兩。檢字歸類用松木盤八十個。長一尺八寸。中安格條。每個工料銀三錢五分。計銀二十八兩。套版格子二十四塊。各長一尺。寬八寸。厚一寸。每個工料銀三錢。計銀七兩二錢。成做收貯木子大櫃十二座。各高七尺二寸。寬五尺一寸。進深二尺二寸。每座各安抽屨二百個。實用工料銀三十兩。計銀三百六十兩。抽屨二千四百個。成釘銅眼錢曲須圈子二千四百副。每副銀一分五釐。計銀三十六兩。木板棧十二條。各長五尺。寬一尺。高一尺五寸。每條工料銀九錢五分。計銀十一兩四錢。通共實用銀二千三百三十九兩七錢五分。查原奏請領過銀二千二百兩。尚不敷銀一百三十九兩七錢五分。請仍向廣儲司支領給發。再查此項木子器具。成造工價。事屬初創。並無成例可援。所有請領價值。俱係實用。實銷。請將此次奏准工料價值。作為定例。造具清冊。咨送武英殿存案。此後如有刷多模糊及槽版等項。應行增添更換之處。即遵照辦理。俟將來四庫全書處交到各書。按次排印完竣後。請將此項木子槽版等件。移交武英殿收貯。遇有應刊通行書籍。即用聚珍版排印通行。為此謹奏。奉旨知道了。欽此。

乾隆三十九年十二月二十六日。臣王際華英廉金簡謹奏。所有應用武英殿聚珍版排印各書。今年十月間會排印禹貢指南。春秋繁露。書錄解題。蠻書共四種。業經裝潢樣本呈覽。今續行校得之鵠冠子一書。現已排印完竣。遵旨刷印連四紙書五部。竹紙書十五部。以備陳設。謹各裝潢樣本一部。恭呈御覽外。又刷印得竹紙書三百部。以備通行。其應行帶往盛京恭貯之處。照例辦理。為此謹奏。奉旨知道了。書交懋勤殿。欽此。

乾隆三十九年十二月初四日。臣永瑤等謹奏。爲奏明事。查四庫全書處供事一項。上年初辦時。翰林院設供事二十名。武英殿繕寫處設供事十二名。首要處設供事四名。聚珍版處設供事十二名。俱以次奏請。荷蒙允准在案。但設立之初。止就當時應用酌量定額。未及通盤籌計。迨行之既久。實有未敷。如翰林院辦書自總裁以下。官至七十餘員。各有所司之事。皆需供事供役。又永樂大典而外。各省送到遺書甚多。一切登記搬貯收發等件。分派承管。頭緒紛繁。實非二十人所能了事。是以臣等於上年七月內。募選額外供事二十七名。幫助辦理。又武英殿及首要處共謄錄六百餘名。校閱各官七十餘員。所有收發書籍。綜核字數。登記各種檔案。日久益繁。近又添有額外謄錄人數愈多。前設供事十六名。仍不敷分辦。臣王際華亦節次募選額外供事十三名。應役。又聚珍版處刊刻木字數十萬。檢查排版。換篇歸類。頭緒更繁。現有供事亦不敷使用。臣金簡亦募選額外供事十二名。協同幫辦。以上各供事等。俱在額設之外。自備資斧飯食効力。其逐日到各該處供役。與額設供事無異。現在既不可少。但無實缺可補。將來即行走多年。亦例不議敘。同一辦事。未免向隅。臣等酌議。將此等額外供事三處共五十二名。一併奏明咨行吏部。于奉旨之日。一體著役註冊。仍毋庸給與公費飯食。俟行走五年之後。如果勤慎得力。與役滿額缺供事一同議敘。庶各供事更加鼓勵。於辦書亦有裨益。爲此公同具奏。請旨。謹奏。奉旨依議。欽此。

乾隆四十一年十二月二十二日。臣金簡謹奏。臣遵旨辦理聚珍版事務。所有印出各書。業經陸續呈進。其中刻字置櫃擺版刷印等事。臣率同承辦字版之原任編修祥慶等悉心講求。務期工簡事速。以仰副

我皇上嘉惠士林之至意。三年以來。排印過書籍約共三十餘種。一切章程。漸皆習熟。臣謹做墨法集要體例。將現在辦法分別條款。著爲圖說。擬名欽定武英殿聚珍版程式。繕繪清本。恭呈御覽。伏候訓示。永遠遵辦。可否卽將此帙擺印通行。俾海內欲將善本流傳之人。皆得曉此刻書簡易之法。似於我皇上右文之盛。愈覃敷於廣遠矣。臣謹奏。奉旨知道了。交四庫全書處總裁閱看。欽此。

乾隆四十一年十二月二十五日。臣永瑤等謹奏。臣等蒙發下侍郎金簡撰進武英殿聚珍版程式一本。交臣等閱看。臣等伏查聚珍版刊行書籍。施工簡而致用博。最爲良法。仰蒙皇上鑒錫嘉名。宸章題咏。實足昭垂奕世。嘉惠藝林。今金簡以現在辦法做墨法集要之例。纂輯成編。紀錄頗爲詳備。俾此後刊書者。皆得有所遵循。於祕籍流傳。殊有裨益。應照所請。卽將此帙交武英殿擺印通行。仍請於全書及薈要內各行抄錄一部。用以傳示久遠。是否如此辦理。伏候訓示遵行。謹奏。奉旨知道了。欽此。

成造木子

聚珍版擺印書籍。固稱簡捷。然以數十萬散字中。撮輯成章。其木子大小。難以畫一。若逐字鏤削。又事繁而工費。故製造木子之法。利用棗木解板。厚四分許。豎裁作方條。寬一寸許。先架疊曬乾。兩面用鐮取平。以淨厚二分八釐爲準。然後橫截成木子。每個約寬四分。豫以硬木一塊。長一尺四寸。寬一寸八分。中挖槽一條。內寬一寸。深三分。底牆欲平直。外牆以鐵鑲口。下首兩牆挖空寸許。將木子數十個。仄排槽內。用活門擠緊。鐮之。以平槽口爲度。是槽深三分。則木子亦淨寬三分。寬厚分數既得。再用木槽一個。其法如

前中挖之槽，只寬三分，而深用七分，將木子豎排于槽內，鐫之平槽口，則得直長之數。凡大木子每個厚二分八釐，寬三分，直長七分，其小木子厚長分數，皆與大木子相同，而寬只二分，將前槽深三分者另製深二分木槽一個，仄排鐫之，即得，但用鐫必須輕捷，若沈著太過，恐鐫齒致損槽口，仍于鐫完後用銅製大小方漏子二個，中空分數與大小木子相符，將木子逐個漏過，自無不準之弊矣。

成造木子圖





